



# SOMMAIRE DE LA RELIGION DES TURCS.

**L**es Turcs croyent vn seul Dieu en vne seule Personne, Createur du Ciel & de la Terre, Remunerateur des bons, & punisseur des meschans, qui a creé le Paradis pour recompenser les gens de bien, & l'Enfer pour la dernière punition des crimes. Ils croyent que Mahomet est vn tres-grand Prophete, que Dieu l'a enuoyé au monde pour enseigner aux hommes le chemin de salut & se nomment Musulmans, c'est à dire, les resignez en Dieu ou les sauuez.

Ils croyent au Decalogue de Moïse, & sont obligez de l'observer, ils festent le Vendredy comme les Chrestiens le Dimanche, ce iour ils s'assemblent aux Temples à l'heure de midy pour faire leurs oraisons.

Ils sont obligez de faire leurs prieres cinq fois le iour, à sçauoir le matin, à midy, à l'heure de Vespere, lors que le Soleil se couche, & à vne heure de nuit.

Ils ieusnent le mois ou la Lune qu'ils appellent Ramazan, pendant ce mois ils ne boient ny ne mangent de tout le iour iusques à ce que le Soleil soit couché, mais la nuit ils boient & mangent selon leurs appetits chair & pois-

son, excepté la chair de pourceau & le vin qui leur sont deffendus en tout temps; apres ce ieufne, ils ont la feste du grand Bairan comme les Chrestiens la Pasque apres le Carisme, ils sont grands fondateurs de Temples, & d'Hospitiaux, & sont obligez de donner aux pauvres le premier iour de l'année, la dixme de ce qu'ils ont gagné pendant l'année precedente.

Ils croyent qu'apres s'estre bien lauez le corps, disant quelque oraison appropriée à cette ceremonie, ils ont aussi l'ame nette de toute sorte d'ordure & de peché, ce qui est cause qu'ils se lauent, & se baignent souuent, principalement auant que de faire leurs oraisons.

Ils n'ont point de Sacrement que la Circoncision, ils font circoncire leurs enfans en l'aage de sept ou huit ans, & lors qu'ils peuuent proferer ces mots **لا اله الا الله** *la ilhailla allha Mehemet rasoul allha* c'est à dire, il n'y a qu'un seul Dieu, Mahomet est son Prophete & son Apostre, c'est leur profession de foy, neantmoins il n'est pas fait mention de la Circoncision en tout l'Alcoran, ils disent qu'ils l'obseruent à l'imitation d'Abraham, la loy duquel leur est recommandée par Mahomet: ils croyent que l'Alcoran luy a esté apporté en diuerses fois par l'Ange Gabriel, dans la ville de la Meque & celle de la Medine, parce que les Iuifs & les Chrestiens auoient alteré les saintes escritures, & la loy de Dieu.

Il leur est permis d'auoir quatre femmes espousees en mesme temps, & autant de filles & de femmes esclaves qu'ils en peuuent nourrir.

Ils peuuent quitter leurs femmes quand bon leur semble, en leur payant ce qu'ils leur ont promis par leur con-

tract de mariage, & se remarier à leur volonté; mais les femmes sont obligées d'attendre iusques à ce qu'on soit assuré qu'elles ne soient pas grosses auant que de se remarier, & les maris sont obligez de garder les enfans, & d'en auoir du soing. Les enfans qu'ils ont de leurs esclaves sont traitez indifferemment comme ceux qu'ils ont de leurs femmes, & sont tous tenus pour legitimes.

Ils ont des Temples, des Colleges & des Hospitaux bien rentez, ils ont des Conuents de Religieux qui uiuent exemplairement, ils obeissent à leurs Supetieurs sans contradiction; & dansent au son des flustes & d'autres instrumens lors qu'ils font leurs oraisons.

Ils ont encore vne autre sorte de Religieux vagabonds par le monde, vestus comme des foux de ce pays, ils vont souuent nuds, & découpent leur peau en plusieurs endroits, ils sont tenus pour saints personnages, & viuent d'aumosne, qui ne leur est iamais refusée; l'vne & l'autre sorte de Religieux se nomment Dreuis, on les cognoist à leurs vestemens, & se peuuent retirer & marier quand bon leur semble.

Ils ne croyent pas que Iesus-Christ soit Dieu, ny Fils de Dieu, ny ne croyent pas en la Sainte Trinité; ils disent que Iesus-Christ est vn grand Prophete, nay de la Vierge Marie, Vierge deuant & apres l'enfantement, qu'il a esté conceu par inspiration Diuine ou par vn souffle Diuin sans Perc, comme Adam a esté créé sans Mere, qu'il n'a pas esté Crucifié, que Dieu l'a esleué au Ciel, & qu'il reuiendra en Terre auant la fin du Monde pour confirmer la Loy de Mahomet; ils assurent aussi que les Iuifs croyans crucifier Iesus Christ crucifierent vn Homme d'entr'eux qui luy ressembloit.

Ils prient Dieu pour les Trespassez, ils inuoquent

